

Gewissenskonflikte im Gaade

Was hoggschen so nixnutzisch im Gaade
 Grad wie wonn de uff Besuch wärsch
 Faul Dier
 Breewelt de Mischdich in meim Kobb
 Do hinne wachse die Quäcke unnerm Baam wie gesät

Unn die Wäsch hosche aach net uffgehängt
 Jetz wärs Zeid wo die Sunn grad so schee scheint
 Iwwerhaupt wie's bei der im Haus aussieht
 Lammedeert de dischdich Kenntich hinnenoh
 Kaa Fenschder gebutzt die Berrer net abgezoh
 Mererdick hoggt de Schtaab iwverall

Unn die Furrie drin im Birro heert aach emoh uffgerahmt
 Rechnunge Babiere
 Alles kreiz die quer
 Was issen eijentlich met de Schdeier
 Wonn machschen die
 Bleggst de Solltich in meim linkge Ohr

Orrer mach emoh e paar Iwwunge fer de Rigge
 Wonn de schunn do haus bisch
 E bissje Gymnastik on de frisch Luft
 Awwer naa do hoggsche erum
 Blärrt de Wolltich seldefreehlich in meim onnere Ohr

Läs wenshdens die Zeirung vun heit
 Noijlt jetz wirrer de Mischdich
 Awwer net nore die Todesohzeische

Wie wärs wonner all emoh die Gusch halle dere
 Grunzt de Lossmich genisslich
 Blinzelt sefreere in die Sunn
 Unn bleest e Ferrersche in die Luft

Maritta Reinhardt,
 Wonsheim



Naachtbesuch

Samtdunkle Schattefliejl. Stumm steijt die Naacht dorchs Fenschter,
 schmeißt Rawe in die Stubb. Sie flatschern wild rumher.
 's kreischt, 's johlt, 's droht, 's doobt un 's hackt, das wiitisch Raweheer
 zieht Krääse um mei Kopp. Es kraahen als un als
 die Schnäwwel, sensescharf. Angscht krallt sich in mei Hals.
 Kriejn die mich am Krawutsch? Schwarz, alles schwarz. Nää! Nää!
 Mei Hänn. Mei Hoor. Mei Stern. Die hann mich schun! Oh weh!
 Ich häng. Ich fliej. E Giggerigi. Verteibt dere Naacht ihr Gespenschter.

Helga Schneider,
 Kaiserslautern

